

ဖိလေမုန်

ဖိလေမုန်ဟို ပေါလုရဲ့ ပေးစာ

နိဒါန်း

တိုးတိုဟူးဘဲရှိဟူ ဖိလေမုန်စာစောင်ဟို တမန်တော် ပေါလုဟု ရေးဟူးဟယ် (၁.၁)။ ပေါလုဟာ အယ်မူပေးစာဟို ရေးနေဟူ ခီမာ သူဟာ ထောန်ကုလနေဟယ်။ အယ်ကြောန့် သူဟာ အယ်မူပေးစာဟို ရောမမြို့ဟုနေ ရေးဟူးဇာ ဖြစ်နိုင်ဟယ်။ သူဟာ ရောမမြို့မရှိနေဟယ် ဆိုဟာ အယ်မူပေးစာဟို ခရစ်တော် မိုးဖွားဘီးန ၆၁ ခုနှစ်လော့-က်မာ ရေးဟူးဇာဖြစ်လေ့မယ်။ အယ်ဆိုဟာ သူဟာ အယ်ပေးစာဟို ကောလောသဲမြို့ဟို ရေးဟူစာန တခီဒဲဖြစ်လေ့မယ်။

သူဟာ အယ်မူပေးစာဟို ဖိလေမုန် နာမယ်ရှိဟူ လူတယော့-က်နားဟို ရေးဟူးဟယ်။ ဖိလေမုန်ဟာ သင်းသားတယော့-က်ဖြစ်ဘီး ကျွန်ဇရှင် တယော့-က်လည်း ဖြစ်လေဟယ်။ ဖိလေမုန်နားဟုနေ ထွပ်ပုလေးဟူးဟူ သူ့ရဲ့ ကျွန် သြနေသိမ်ဟို ပြစ်ဒန်ပေးဘဲနေအော်န တောင်းဆိုဟို တွပ် ပေါလုဟာ သူနားဟို စာရေးဟူးလေဟယ်။ ရောမဥပဒေရ ဖိလေမုန်ဟာ သြနေသိမ်ဟို သတ်ပိုင်ခွမ်ရှိဟယ်။ ခရစ်ယာန်ညီကို တယော့-က်ဖြစ် သြနေသိမ်ဟို လတ်ခံဟိုတွပ် ဖိလေမုန်ဟို အားပေးဟို ဆိုဘီး ပေါလုဟာ စည်း

ရောင်းမှု အားကောင်းဟူ ဂြင်းခုချစ်လေဟို့ သောင်းပြု
ဟူးဘီး သြနေသိမ်ဟို့ ပေါလုနားမာ ကူညီဟို့တွပ် ခွမ့်
ပြုပေးဟို့ ဆိုဘီး ကြံတောင်းပေးဟူးသေးဟယ် (၁.၁၃-
၁၄)။

ကြောင်းရာ ကျဉ်းချောက်

၁။ ပေါလုဟာ ဖိလေမုန်ဟို့ နှော့-က်ဆစ်ဟူးဟူကြော
န်း (၁-၃)

၂။ ဖိလေမုန်ဟု သြနေသိမ်ဟို့ ခရစ်ယာန်ညီကို တ
ယော့-က်ဖြစ် လတ်ခံပေးဟို့ ဆိုဘီး ပေါလုဟာ သြ
နေသိမ်ကိုယ်စား တောင်းဆိုပေးဟူးဟူကြောင်း (၄-
၂၁)

၃။ ပေါလုဟာ အီးခလယ်သွားဟို့နဲ့ နှော့-က်ဆစ်စကား
ပြောရှင်းအားဖြင့် နိဂေါင်းချောက်ဟူးဟူကြောင်း
(၂၂-၂၅)

¹ ယေရှုခရစ်တော်ရဲ့ မှုတော်အားဖြင့် ကျဉ်းကုလခံ
နေရဟူသူ ငါပေါလုန ငါ့ညီတိမောသေဟာ —

နို့လေရှစ်ရဟူ လောက်ဖော်ဆောန်ဖတ် ဖိလေမုန်ဟု
နေစဘီး ² နို့လေရှစ်ရဟူညီမ အပုပိ၊ နို့လေရဲ့စစ်သူရဲ
လေဖြစ်ဟူ အာခိပုပုဟုနေစဘီး နန့်ရဲ့အီမာ စုဝီး
ဟူ သင်းတော်ဟု သင်းဝမ်ဟူသူလေ ဂူလောင်းနားဟို့
စာရေးလိုက်ပါဟယ်။

³ နို့လေရဲ့ ဘုရားသခင်နဲ့ ယေရှုခရစ်တော်နားဟု ကျေးဇူးတော်နဲ့ ငြိသတ်ရှင်းဟာ နန်းနို့လေမာ ရှိဂေပါစေ။

ဖိလေမုန်ရဲ့ မြစ်တာနဲ့ ယောင်ကြည်မှုကြောင်း

⁴ ငါဟာ ငါ့ရဲ့ ဆုတောင်းချစ်လေမာ နန်းဟို့ မြဲဒမ်းဒီရဘီး ဘုရားသခင်ရဲ့ ကျေးဇူးတော်ဟို့ ချီးမွမ်းပါဟယ်။

⁵ ဖြားဖြစ်ကြောနဲ့ဆိုဟာ သခင်ယေရှုနဲ့ သန့်ရှင်းသူလေ ဂူလောင်းဟို့ နန်ထားဟူ ရှစ်ရှင်းမြစ်တာနဲ့ ယောင်ကြည်မှုကြောင်းဟို့ နို့လေကြားသိရဟယ်။

⁶ အယ်ကြောနဲ့ ယောင်ကြည်သူလေဖြစ်ဟူ နန်းနို့နဲ့ နို့လေဟာ ရှင်းရှင်း မိတ်သဟာယဖွဲ့ရှင်းအားဖြင့် ခရစ်တော်နဲ့ တလောင်းတဝဖြစ်ဘီး နို့လေခံစားရဟူ ကောင်းဂျီး မင်္ဂလာလေဟို့ ပိုဘီး နတ်နတ်ရှိုင်းရှိုင်း သိနားလည်နိုင်ဂေဟို့တွပ် ငါဆုတောင်းပါဟယ်။

⁷ ငါ့ညီ၊ နန်ဟာ ဘုရားသခင်ရဲ့ သန့်ရှင်းသူလေရဲ့ စိနှလောင်းဟို့ သတ်သာစေဟူကြောနဲ့ နန်းရဲ့ မြစ်တာဟို့ ထော့-က်ဘီး နို့လေဟာ ရရာတိုင်း ဝန်းသာဂေပါဟယ်။

သြနေသိမ်တွပ် မြစ်တာရပ်ခံဟူကြောင်း

⁸ အယ်ကြောနဲ့ ငါဟာ နန်လောက်ရဟို့ဇာလေဟို့ ပညတ်ဟားဟို့တွပ် ခရစ်တော်အားဖြင့် မိန့်ပေးခွင့်ရှိဟူလည်းဘဲ့၊

⁹ ရှစ်ရှင်းမြစ်တာအားဖြင့်ဘဲ့ နန်းဟို့ တောင်းဗန်ရှင်းမှုဟို့ ပြုပါဟယ်။ အယ်မျိုး သက်ကီးဟူသူဖြစ်ဘီး ခုဆိုဟာ

ခရစ်တော်ယေရှုရဲ့ သံတမန်ဖြစ်ဟူ၊ ကျဉ်းသားလည်းဖြစ်
ဟူ* ငါပေါလုဟာ၊

10 တောက်နှောခံနေရဟူ ခီမာ ခရစ်တော်နှိုက် ငါ့သား
ဖြစ်ဟူ ဩနေသိမ်တွပ် မြစ်တာရပ်ခံပါဟယ်။

11 သူဟာ စဟ နန့်တွပ် သောင်းဝမ်ဘဲဟူလည်းဘဲ ခုခီ
မာ နန့်တွပ်ရော ငါ့တွပ်ပါ သောင်းဝမ်သူ† ဖြစ်လာပါဘီ။

12 သူ့ဟို နန့်နားဟို ပုလန်လွတ်လိုက်ဟူကြောန့် သူ့ဟို
ငါ့ရင်သွေးမျိုး လတ်ခံပေးပါ။

13 ငါဟာ ဒန်းကောင်းဟို ဟောပြောဟူကြောန့် တောက်
နှောခံနေရဟူ ခီမာ နန့်ရဲ့ ကိုယ်စား ငါ့ဟိုကူညီဟိုတွပ် သူ
ဟိုခေါ်ဟူးရှင်ပါဟယ်။

14 အယ်ဘေမဲ့ နန့်ပြုဟူကောင်းမှုဟာ လွဲရှောန်ရဘဲဟို
ပြုဟူဇာမျိုးမှုဘဲန နန့်စေတနာအားဖြင့်ဘဲ ပြုစေရှင်ပါဟ
ယ်။

15 ဩနေသိမ်ဟာ နန့်နမ္မဒမ်းနေရဟိုတွပ် ရှစ်ဟူးခွဲခွာ
နေရဟယ် ဆိုဘီး ထန်မှတ်ဇာရှိဟယ်။

16 အယ်မျိုးပြောဟူဇာဟာ စေခံကျန်ဟိုရဟူမျိုး ဆိုလို
ဇာမှုဟ။ ထူးသဖြင့် ငါ့တွပ်ဟ ရှစ်ရဟူညီ နန့်တွပ်ဟ ဇာတိ
အားဖြင့်ဘဲဖြစ်ဖြစ်၊ သခင်ဘုရားအားဖြင့်ဘဲဖြစ်ဖြစ် ပို
ဘီး ရှစ်ဟူ ညီတယော့-က်ဟိုရဟူမျိုး ဆိုလိုဇာဖြစ်ဟယ်။

* 1:9 ဇ ခရစ်တော်ယေရှုရဲ့ သံတမန်ဖြစ်ဟူ၊ ကျဉ်းသားလည်းဖြစ်ဟူ၊
အယ်မျိုးမှုဘဲနေဟာ သတ်ကီးသူ၊ အယ်ဘီးဟာ ခရစ်တော်ယေရှုရဲ့
သံတမန်။ 1:10 ဘဝ ကော ၄:၉ † 1:11 ဘဝ ဩနေသိမ်ရဲ့
ဟေလသနာမယ်ရဲ့ ဓိပါယ်ဟ “သောင်းဝမ်သူ”။

17 အယ်မျိုးဖြစ်ကြောင့် နန်ဟာ ငါ့ဟို့ လောက်ဖော်ဆော
န့်ဖတ်တယော့-က်နေန မှတ်ယူဟယ် ဆိုဟာ ငါ့ဟို့လတ်ခံ
မျိုးဘဲ သူ့ဟို့လည်းလတ်ခံပါ။

18 တကယ်ကြောင့် သူဟာ နန်ဟို့ ပြစ်မှားမိဟူ ဇာဘဲ
ဖြစ်ဖြစ်၊ တန်ဟူကြွေးဘဲဖြစ်ဖြစ် တခုခုပေးဇာရှိမယ် ဆို
ဟာ ငါတာဝန်ယူပါဟယ်။

19 ငါပေါလုဟာ အယ်ကြွေးလေဟို့ ဆပ်ပေးပါမယ် ဆို
ဘီး ငါ့လတ်န ရေးလိုက်ပါဟယ်။ နန်ကိုယ်တိုင် နန်ရဲ့
ဘဝသစ်တွပ် ငါ့ဟို့ ပေးဆပ်ဇာရှိဟယ် ဆိုဘီး ပြောရှင်
ဇာ မူဟူ။

20 အယ်ကြောင့် ငါ့ညီ၊ သခင်ဘုရားရဲ့ မျစ်နှာဟို့
ထော့-က်ဘီး ငါ့ဟို့ ကျေးဇူးပြုစေရှင်ပါဟယ်။ ခရစ်တော်
နှိုက် ညီကိုတယော့-က်နေန ငါ့စိန်လောင်းဟို့ သတ်သာ
စေပါ။

21 နန်ဟာ ငါမြစ်တာရပ်ခံဟူတိုင်း လောက်လေ့မယ် ဆို
ဇာဟို့ စိခလယောင်ကြည့်ဘီး အယ်စာဟို့ ရေးလိုက်ပါဟ
ယ်။ တကယ်ဘဲ အယ်ထပ် ပိုဘီး လောက်လေ့မယ် ဆိုဇာ
ငါသိပါဟယ်။

22 နော့-က်ဘီး ငါတည်းခိုဟို့နေရာ ခန်းတခန်းဟို့လည်း
ဆင်သင့်ပြင်ဟူးပါ။ ဖြားဖြစ်ကြောင့်နူးဆိုဟာ ဘုရားသခ
င်ဟာ နန်းနို့လေရဲ့ ဆုတောင်းရှင်းဟို့ နားညောင်းဟူကြော
န့် ငါ့ဟို့ နန်းနို့နားဟို့ ပုလန်ဘီးပို့ဆောင်ပေးတော်မူလေ့
မယ် ဆိုဘီး မျှော်လင့်ဟူကြောင့်ဖြစ်ပါဟယ်။

နှော-က်ဆောင်း နှောက်ဆစ်ဟူကြောင်း

²³ ခရစ်တော်ယေရှုကြောင့် ငါနတူးဒု ကျဉ်းကုလခံရဟူ
ပေပြဟုနေစဘီး၊

²⁴ ငါ့ရဲ့လောက်ဖော်ဆောန်ဖတ်လေဖြစ်ဟူ မာကု၊ အာ
ရိတုတာခု၊ ဒေမ၊ လုကာလေဟုလည်း နန်းဟို့ နှောက်ဆစ်
ဂေပါဟယ်။

²⁵ နို့လေသခင်ယေရှုခရစ်တော်ရဲ့ ကျေးဇူးတော်ဟာ
နန်းနို့ဝိညာဉ်နတူးဒု ရှိပါစေ။

1:23 ၂၃ ကော ၁.၇: ၄.၁၂ **1:24** ၁.၂၄ က တ ၁၂.၁၂, ၂၅: ၁၃.၁၃;
၁၅.၃၇-၃၉: ကော ၄.၁၀: **ခ** တ ၁၉.၂၉: ၂၇.၂: ကော ၄.၁၀: **ဂ**ကော ၄.၁၄: ၂
တိ ၄.၁၀: **ဃ** ကော ၄.၁၄: ၂ တိ ၄.၁၁

ဓမ္မသစ်ကျမ်း ထားဝယ်ဘာသာစကား
The Holy Bible in the Tavoyan language of
Myanmar: ဓမ္မသစ်ကျမ်း ထားဝယ်ဘာသာစကား

copyright © 2024 The Word for the World International

Language: (Tavoyan)

Contributor: The Word for the World International

ထားဝယ် ဓမ္မသစ်ကျမ်း

The New Testament in Dawei Language

The Word for the World

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

0c63f106-1001-58e4-ad11-6f62c327c4e1